

A. D. 1903.

CURRENTA XIII.

N. 5211.

VENERABILIBUS FRATRIBUS
PATRIARCHIS PRIMATIBUS ARCHIEPISCOPIS EPISCOPIS
ALIISQUE LOCORUM ORDINARIIS
PACEM ET COMMUNIONEM CUM APOSTOLICA SEDE HABENTIBUS
PIUS PP. X.
VENERABILES FRATRES
SALUTEM ET APOSTOLICAM BENEDICTIONEM.

E supremi apostolatus cathedra, ad quam, consilio Dei inscrutabili, evecti fuimus, vobis primum eloquuturos, nihil attinet commemorare quibus Nos lacrymis magnisque precibus formidolosum hoc Pontificatus onus depellere a Nobis conati simus. Videmur equidem Nobis, etsi omnino meritis impares, convertere in rem Nostram posse quae Anselmus, vir sanctissimus, querebatur quum, adversans et repugnans, coactus esse honorem episcopatus suscipere. Etenim quae ille moeroris indicia pro se afferebat, eadem et Nobis proferre licet, ut ostendamus quo animo, qua voluntate Christi gregis pascendi gravissimum officii munus exceperimus. *Testantur, sic ille ¹⁾, lacrymae meae et voces et rugitus a gemitu cordis mei, quales nunquam de me, ullo dolore, memini exiisse ante diem illam, in qua sors illa gravis archiepiscopatus Canturiae visa est super me cecidisse. Quod ignorare nequiverunt illi qui, ea die, vultum meum inspexerunt... Ego magis mortuo quam viventi colore similis, stupore et dolore pallebam. Huic autem de me electioni, imo violentiae, hactenus, quantum potui, servata veritate, reluctatus sum. Sed iam, velim nolim, cogor fateri quia quotidie iudicia Dei magis ac magis conatui meo resistunt, ut nullo modo videam me ea posse fugere. Unde iam, non tam hominum quam Dei, contra quam non est prudentia, victus violentia, hoc solo intelligo me uti debere consilio, ut postquam oravi quantum potui, et conatus sum ut, si possibile esset, calix iste transiret a me ne biberem illum... meum sensum et voluntatem postponens, me sensui et voluntati Dei penitus committam.*

Nec plane repugnandi causae, multae et maximae, defuerunt Nobis. Praeterquam enim quod honore pontificatus, ob tenuitatem Nostram, nullo pacto Nos dignaremur; quem non moveret ei se successorem designari, qui, cum ecclesiam sex fere ac viginti annos sapientissime rexisset, tanta valuit alacritate ingenii, tanto virtutum omnium

¹⁾ Epp. I. III. ep. 1.

splendore, ut vel adversarios in sui admirationem traduxerit et memoriam sui nominis factis praeclarissimis consecrarit? — Dein, ut praetereamus cetera, terreat Nos, quam quod maxime, ea quae modo est humani generis conditio afflictissima. Quem enim lateat, consociationem hominum gravissimo nunc, supra praeteritas aetates, atque intimo urgeri morbo; qui in dies ingravescens eamque penitus exedens ad exitum rapit? Morbus qui sit, intelligitis, Venerabiles Fratres; defectio abscessioque a Deo: quo nihil profecto cum pernicie coniunctius, secundum Prophetarum dictum ¹⁾: *Quia ecce, qui elongant se a te, peribunt*. Tanto igitur malo, pro pontificali munere quod demandabatur, occurrendum esse Nobis videbamus; arbitrabamur enim Dei iussum ad Nos pertinere: *Ecce constituti te hodie super gentes et super regna, ut evellas et destruas, et aedifices et plantes* ²⁾; verum conscii Nobis infirmitatis Nostrae, negotium, quod nihil simul haberet morae et difficultatis plurimum, suscipere verebamus.

Attamen, quoniam numini divino placuit humilitatem Nostram ad hanc amplitudinem potestatis provehere; erigimus animum *in eo qui Nos confortat*, Deique virtute freti manum operi admoventes, in gerendo pontificatu hoc unum declaramus propositum esse Nobis *instaurare omnia in Christo* ³⁾, ut videlicet sit *omnia et in omnibus Christus* ⁴⁾. Erunt profecto qui, divina humanis metientes, quae Nostra sit animi mens rimari nitantur atque ad terrenos usus partiumque studia detorquere. His ut inanem spem praedicamus, omni asseveratione affirmamus nihil velle Nos esse, nihil, opitulante Deo, apud consociationem hominum futuros, nisi Dei, cuius utimur auctoritate, administros. Rationes Dei rationes Nostrae sunt; pro quibus vires omnes vitamque ipsam devovere decretum est. Unde si qui symbolum a Nobis expetant, quod voluntatem animi patefaciat; hoc unum dabimus semper: *Instaurare omnia in Christo!*

Quo quidem in praeclaro opere suscipiendo urgendoque illud Nobis, Venerabiles Fratres, alacritatem affert summam, quod certum habemus fore vos omnes strenuos ad perficiendam rem adiutores. Id enim si dubitemus, ignaros vos, non sane iure, aut negligentes putaverimus nefarii illius belli, quod nunc, ferme ubique, commotum est atque alitur adversus Deum. Vere namque in Auctorem suum *fremuerunt gentes et populi meditati sunt inania* ⁵⁾; ut communis fere ea vox sit adversantium Deo: *Recede a nobis* ⁶⁾. Hinc extincta omnino in plerisque aeterni Dei reverentia, nullaue habita in consuetudine vitae, publice ac privatim, supremi eius numinis ratio: quin totis nervis contenditur omnique artificio, ut vel ipsa recordatio Dei atque notio intereat penitus.

Haec profecto qui reputet, is plane metuat necesse est ne malorum, quae supremo tempore sunt expectanda, sit perversitas haec animorum libamentum quoddam ac veluti exordium; neve *filius perditionis*, de quo Apostolus loquitur ⁷⁾, iam in hisce terris versetur. Tanta scilicet audacia, eo furore religionis pietas ubique impetitur, revelatae fidei documenta oppugnantur, quaeque homini cum Deo officia intercedunt tollere delere prorsus praefracte contenditur! E contra, quae, secundum Apostolum eundem, propria est *Antichristi* nota, homo ipse, temeritate summa, in Dei locum invasit, extollens se *supra omne quod dicitur Deus*; usque adeo ut, quamvis Dei notitiam extin-

¹⁾ Ps. LXXII, 27. — ²⁾ Ierem. I, 10. — ³⁾ Ephes. I, 10. — ⁴⁾ Coloss. III, 11. — ⁵⁾ Ps. II, 1. — ⁶⁾ Iob. XXI, 14. — ⁷⁾ II Thess. II, 3.

guere penitus in se nequeat, Eius tamen maiestate reiecta, aspectabilem hunc mundum sibi ipse veluti templum dedicaverit a ceteris adorandus. *In templo Dei sedeat, ostendens se tamquam sit Deus* ¹⁾).

Enimvero hoc adversus Deum mortalium certamen qua sorte pugnetur nullus est sanae mentis qui ambigat. Datur quidem homini, libertate sua abutenti, rerum omnium Conditoris ius atquæ numen violare; veruntamen victoria a Deo semper stat: quin etiam tum prior clades imminet, quum homo, in spe triumphi, insurgit audentior. Haec ipse Deus nos admonet in Scripturis sanctis. *Dissimulat scilicet peccata hominum* ²⁾, suae veluti potentiae ac maiestatis immeror: mox vero, post adumbratos recessus *excitatus tamquam potens crapulatus a vino* ³⁾, *confringet capita inimicorum suorum* ⁴⁾; ut norint omnes *quoniam rex omnis terrae Deus* ⁵⁾, et *sciant gentes quoniam homines sunt* ⁶⁾).

Haec quidem, Venerabiles Fratres, fide certa tenemus et expectamus. Attamen non ea impediunt quominus, pro nostra quisque parte, Dei opus maturandum nos etiam curemus: idque, non solum efflagitando assidue: *Exurge Domine, non confortetur homo* ⁷⁾; verum, quod plus interest, re et verbo, luce palam, supremum in homines ac naturas ceteras Dei dominatum adserendo vindicandoque, ut Eius imperandi ius ac potestas sancte colatur ab omnibus et observetur. — Quod plane non modo officium postulat a natura profectum, verum etiam communis utilitas nostri generis. Quorumnam etenim, Venerabiles Fratres, animos non conficiat trepidatio ac moeror, quum homines videant, partem maximam, dum quidem humanitatis progressus haud immerito extolluntur, ita digladiari atrociter inter se, ut fere sit omnium in omnes pugna? Cupiditas pacis omnium profecto pectora attingit, eamque nemo est qui non invocet vehementer. Pax tamen, reiecto Numine, absurde quaeritur: unde namque abest Deus, iustitia exsultat; sublataquæ iustitia, frustra in spem pacis venit. *Opus iustitiae pax* ⁸⁾. — Novimus equidem non paucos esse, qui studio pacis ducti, *tranquillitatis nempe ordinis*, in coetus factionesque coalescunt, quæ ab *ordine* nominant. Proh tamen spes curasque inanes! Partes *ordinis*, quæ pacem afferre turbatis rebus reapse queant, unæ sunt: partes faventium Deo. Has igitur promovere necesse est, ad easque quo licebit plures adducere, si securitatis amore incitamus.

Verum haec ipsa, Venerabiles Fratres, humanarum gentium ad maiestatem Dei imperiumque revocatio, quantumvis licet conemur, numquam nisi per Iesum Christum eveniet. Monet enim Apostolus: *Fundamentum aliud nemo potest ponere praeter id quod positum est, quod est Christus Iesus* ⁹⁾. Scilicet unus ipse est, *quem Pater sanctificavit et misit in mundum* ¹⁰⁾; *splendor Patris et figura substantiae eius* ¹¹⁾, Deus verus verusque homo: sine quo, Deum, ut oportet, agnoscere nemo possit; nam *neque Patrem quis novit nisi Filius, et cui voluerit Filius revelare* ¹²⁾. — Ex quo consequitur, ut idem omnino sit *instaurare omnia in Christo* atque homines ad Dei obtemperationem reducere. Huc igitur curas intendamus oportet, ut genus hominum in Christi ditionem redigamus: eo praestito, iam ad ipsum Deum remigraverit. Ad Deum inquit, non socordem illum atque

¹⁾ II. Thess. II., 2. — ²⁾ Sap. XI., 24. — ³⁾ Ps. LXXVII., 65. — ⁴⁾ Ps. LXVII., 22. — ⁵⁾ Ib. XLVI., 8. — ⁶⁾ Ib. IX., 20. — ⁷⁾ Ps. IX., 19. — ⁸⁾ Is. XXXII., 17. — ⁹⁾ I. Cor. III., 11. — ¹⁰⁾ Io. X. 36. — ¹¹⁾ Hebr. I., 3. — ¹²⁾ Matth. XI., 36.

humana negligentem, quem *materialistarum* deliramenta effinxerunt; sed Deum vivum ac verum, unum natura personis trinum, auctorem mundi, omnia sapientissime providentem, iustissimum denique legis latorem, qui sontes plectat, proemia proposita virtutibus habeat.

Porro quae iter nobis ad Christum pateat, antea oculos est: per Ecclesiam videlicet. Quamobrem iure Chrysostomus: *Spes tua Ecclesia, salus tua Ecclesia, refugium tuum Ecclesia* ¹⁾. In id namque illam condidit Christus, quaesitam sui sanguini pretio; eique doctrinam suam ac suarum praecepta legum commendavit, amplissima simul impertiens divinae gratiae munera ad sanctitatem ac salutem hominum.

Videtis igitur, Venerabiles Fratres, quale demum Nobis vobisque pariter officium sit demandatum: ut consociationem hominum, a Christi sapientia aberrantem, ad Ecclesiae disciplinam revocemus; Ecclesia vero Christo subdet, Christus autem Deo. Quod si, Deo ipso favente, perficiemus, iniquitatem cessisse aequitati gratulabimur, audiemusque feliciter *vocem magnam de coelo dicentem: Nunc facta est salus et virtus et regnum Dei nostri et potestas Christi eius* ²⁾. — Hic tamen ut optatis respondeat exitus, omni ope et opera eniti opus est ut scelus illud immane ac detestabile, aetatis huius proprium, penitus eradamus, quo se nempe homo pro Deo substituit: tum vero leges Evangelii sanctissimae ac consilia in veterem dignitatem vindicanda; adserendae altius veritates ab Ecclesia traditae, quaeque eiusdem sunt documenta de sanctitate coniugii, de educatione doctrinaque puerili, de bonorum possessione atque usu, de officiis in eos qui publicam rem administrant; aequilibras demum inter varios civitatis ordines christiano instituto ac more restituenda. — Nos profecto haec Nobis, Dei nutui obsequentes, in pontificatu presequenda proponimus, ac pro virili parte prosequemur. Vestrum autem erit, Venerabiles Fratres, sanctitate, scientia, agendorum usu, studio cum primis divinae gloriae, industriis Nostris obsecundare; nihil aliud spectantes praeterquam ut in omnibus *formetur Christus* ³⁾.

Iam quibus ad rem tantam utamur adiumentis, vix dicere oportet; sunt enim de medio sumpta.—Curarum haec prima sunt, ut Christum formemus in iis, qui formando in ceteris Christo officio muneris destinantur. Ad sacerdotes mens spectat, Venerabiles Fratres. Sacris namque quotquot initiati sunt, eam in populis, quibuscum versantur, provinciam sibi datam norint, quam Paulus suscepisse testatus est amantissimis iis verbis: *Filioli mei quos iterum parturio donec formetur Christus in vobis*). Qui tamen exple-re munus queant, nisi priores ipsi Christum induerint? atque ita induerint, ut illud Apostoli eiusdem usurpare possint: *Vivo ego, iam non ego vivit vero in me Christus* ⁴⁾. *Mihi vivere Christus est* ⁵⁾. Quamobrem, etsi ad fideles omnes pertinet hortatio *ut occurramus in virum perfectum, in mensuram aetatis plenitudinis Christi* ⁶⁾; praecipue tamen ad illum spectat qui sacerdotio fungitur; qui idcirco dicitur *alter Christus*, non una sane potestatis communicatione sed etiam imitatione factorum, qua expressam in se Christi imaginem praeferat.

¹⁾ Hom. de capto Eutropio, n. 6. — ²⁾ Apoc. XII., 10. — ³⁾ Gal. IV., 19. — ⁴⁾ Ibid.

⁵⁾ Gal. II., 20. — ⁶⁾ Philip. I., 21. — ⁷⁾ Ephes. IV., 3.

Quae cum ita sint, quae vobis quantaque, Venerabiles Fratres, ponenda cura est in clero ad sanctitatem omnem formando! huic, quaecumque obveniant, negotia cedere necesse est. Quamobrem pars potior diligentiarum vestrarum sit de seminariis sacris rite ordinandis monerandisque, ut pariter integritate doctrinae et morum sanctitate floeant. Seminarium cordis quisque vestri delicias habetote, nihil plane ad eius utilitatem omittentes, quod est a Tridentina Synodo providentissime constitutum. — Quum vero ad hoc ventum erit ut candidati sacris initiari debeant, ne quaeso excidat animo quod Paulus Timotheo perscripsit: *Nemini cito manus imposueris* ¹⁾; illud attentissime reputando, tales plerumque fideles futuros, quales fuerint quos sacerdotio destinabitis. Quare ad privatam quancumque utilitatem respectum habetote; sed unice spectetis Deum et Ecclesiam et sempiterna animorum commoda, ne videlicet, uti Apostolus praecavet, *communicetis peccatis alienis* ²⁾. — Porro sacerdotes initiati recens atque e seminario digressi industrias vestras ne desiderent. Eos, ex animo hortamur, pectori vestro, quod coelesti igne calere oportet, admovete saepius, incendite, inflammate ut uni Deo et lucris animorum inbient. Nos equidem, Venerabiles Fratres, diligentissime providebimus ne homines sacri cleri ex insidiis capiantur novae cuiusdam ac fallacis scientiae, quae Christum non redolet, quaeque, fucatis astutisque argumentis, *rationalismi* aut *semirationalismi* errores invehere nititur; quos ut caveret iam Apostolus Timotheum monebat, scribens: *Depositum custodi, devitans profanas vocum novitates et oppositiones falsi nominis scientiae, quam quidam promittentes, circa fidem exciderunt* ³⁾. Hoc tamen non impedimur quo minus laude dignos existimemus illos e sacerdotibus iunioribus, qui utilium doctrinarum studia, in omni sapientiae genere, persequuntur, ut inde ad veritatem tuendam atque osorum fidei calumnias refellendas instructiores fiant. Veruntamen celare haud possumus, quin etiam apertissime profiteamur, primas Nos semper delaturos iis qui, quamvis sacras humanasque disciplinas minime praetereunt, proxime nihilosecius animorum utilitatibus se dedant, eorum procuratione munerum, quae sacerdotem deceant divinae gloriae studiosum. *Tristitia Nobis magna est et continuus dolor cordi* Nostro ⁴⁾, quum cadere etiam in aetatem nostram conspiciamus Ieremiae lamentationem: *Parvuli petierunt panem, es non erat qui frangeret eis* ⁵⁾. Non enim de clero desunt, qui pro cuiusque ingenio, operam forte navent rebus adumbratae potius quam solidae utilitatis: at verum non adeo multi numurentur qui, ad Christi exemplum, sibi sumant Prophetarum dictum: *Spiritus Domini unxit me evangelizare pauperibus misit me sanare contritos corde, praedicare captivis remissionem et coecis visum* ⁶⁾. — Quem tamen fugiat, Venerabiles Fratres, quum homines ratione maxime ac libertate ducantur, religionis disciplinam potissimam esse viam ad Dei imperium in humanis animis restituendum? Quot plane sunt qui Christum oderunt, qui Ecclesiam, qui Evangelium horrent ignoratione magis quam pravitate animi! de quibus iure dixeris: *quaecumque ignorant blasphemant* ⁷⁾. Idque non in plebe solum reperire est aut in infima multitudine, quae ideo in errorem facile trahitur; sed in exultis etiam ordinibus atque adeo in iis, qui haud mediocri cruditione ceteroqui poleant. Hinc porro in plerisque defectus fidei. Non enim dandum est, scien-

¹⁾ I. Tim. V., 22. — ²⁾ Ibid. — ³⁾ I. Tim. VI., 20 s. — ⁴⁾ Rom. IX., 2. — ⁵⁾ Thren. IV., 4. — ⁶⁾ Luc. IV., 18—19. — ⁷⁾ Iud. II., 10.

tiae progressibus extingui fidem, sed verius inscitia; ut idcirco ubi maior sit ignorantia, ibi etiam latius pateat fidei defectio. Quapropter Apostolis a Christo mandatum est: *Euntes, docete omnes gentes* ¹⁾.

Nunc autem, ut ex docendi munere ac studio fructus pro spe edantur atque in omnibus *formetur Christus*, id penitus in memoria insideat, Venerabiles Fratres, nihil omnino esse caritate efficacius. *Non enim in comotione Dominus* ²⁾. Allici animos ad Deum amariore quodam conatu, speratur perperam: quin etiam errores acerbius increpare, vitia vehementius reprehendere damno magis quam utilitati aliquando est. Timotheum quidem Apostolus hortabatur: *Argue, obsecula, increpa*; attamen addebat: *in omni patientia* ³⁾. — Certe eiusmodi nobis exempla prodidit Christus. *Venite*, sic ipsum alloquutum legimus, *venite ad me omnes qui laboratis et onerati estis, et ego reficiam vos* ⁴⁾. Laborantes autem oneratosque non alios intelligebat, nisi qui peccato vel errore tenerentur. Quanta enimvero in divino illo magistro mansuetudo! quae suavitas, quae in aerumnosos quoslibet miseratio! Cor eius plane pinxit Isaias iis verbis: *Ponam spiritum meum super eum; non contendet neque clamabit; arundinem quassatam non confringet et linum fumigans non extinguet* ⁵⁾. — Quae porro caritas, *patiens et benigna* ⁶⁾ ad illos etiam porrigatur necesse est, qui sunt nobis infesti vel nos inimice insectantur. *Maledicimur et benedicimus*, ita de se Paulus profitebatur, *persecutionem patimur et sustinemus, blasphemamur et obsecramus* ⁷⁾. Peiores forte quam sunt videntur. Consuetudine enim aliorum, praeiudicatis opinionibus, alienis consiliis et exemplis, malesuada demum verecundia in impiorum partem translati sunt: attamen eorum voluntas non adeo est depravata, sicut et ipsi putari gestiunt. Quidni speremus christianae caritatis flammam ab animis caliginem dispulsuram atque allaturam simul! Dei lumen et pacem? Tardabitur quandoque forsitan laboris nostri fructus; sed caritas sustentatione nunquam defatigatur, memor non esse praemia a Deo proposita laborum fructibus sed voluntati.

Attamen, Venerabiles Fratres, non ea Nobis mens est ut, in toto hoc opere tam arduo restitutionis humanarum gentium in Christo, nullos vos clerusque vester adiutores habeatis. Scimus mandasse Deum unicuique de proximo suo ⁸⁾. Non igitur eos tantum, qui sacris se addixerunt, sed universos prorsus fideles rationibus Dei et animorum adlaborare oportet: non Marte utique quemque suo atque ingenio, verum semper Episcoporum ductu atque nutu; praeesse namque, docere, moderari nemini in Ecclesia datur praeter quam vobis, *quos Spiritus Sanctus posuit regere Ecclesiam Dei* ⁹⁾. — Catholicos homines, vario quidem consilio atsemper religionis bono, coire inter se societatem, Decessores Nostri probavere iamdiu bonaque precatione sanxerunt. Institutum porro egregium Nos etiam laudatione Nostra ornare non dubitamus, optamusque vehementer ut urbibus agrisque late inferatur ac floreat. Verumenimvero consociationes eiusmodi eo primo ac potissimum spectare volumus, ut quotquot in illas cooptantur christiano more constanter vivant. Parum profecto interest quaestiones multas subtiliter agitari, deque iuribus et officiis eloquenter disseri, ubi haec ab actione fuerint seiugata. Postulant enim actionem tempora; sed eam quae tota sit in divinis legibus atque Ecclesiae

¹⁾ Matth. XXVIII., 19. — ²⁾ III. Reg. XIX., 11. — ³⁾ II. Tim. IV. 2. — ⁴⁾ Matth. XI., 28. — ⁵⁾ Is. XLII., 1 s. — ⁶⁾ I. Cor. XIII., 4. — ⁷⁾ Ibid. IV., 12 s. — ⁸⁾ Eccli XVII., 12. — ⁹⁾ Act. XX., 28.

praescriptis sancto integreque servandis, in religione libere aperteque profitenda, in omnigenae demum caritatis operibus exercendis, nullo sui aut terrenarum utilitatum respectu. Illustria ejusmodi tot Christi militum exempla longe magis valitura sunt ad commovendos animos rapiendosque quam verbo exquisitaeque disceptationes; fietque facile ut, abjecto metu, depulsis praeiudiciis ac dubitationibus, quamplurimi ad Christum traducantur provehantque ubique notitiam eius et amorem; quae ad germanam solidamque beatitatem sunt via. Profecto si in urbibus, si in pagis quibusvis praecepta Dei tenebuntur fideliter, si sacris erit honos, si frequens sacramentorum usus, si cetera custodientur quae ad christianae vitae rationem pertinent; nihil admodum, Venerabiles Fratres, elaborandum erit ulterius ut omnia in Christo instaurentur. Neque haec solum coelestium bonorum prosecutionem spectare existimentur: iuvabunt etiam, quam quae maxime, ad huius aevi publicasque civitatum utilitates. His namque obtentis, optimates ac locupletes aequitate simul et caritate tenuioribus aderunt, hi vero afflictioris fortunae angustias sedate ac patienter ferent; cives non cupiditati sed legibus parebunt; principes et quotquot rempublicam gerunt, quorum *non est potestas nisi a Deo*¹⁾, vereri ac diligere sanctum erit. Quid plura? Tunc demum omnibus persuasum fuerit debere Ecclesiam, prouti ab auctore Christo est condita, plena integraque libertate frui nec alienae dominationi subiici; Nosque, in hac ipsa libertate vindicanda; non religionis modo sanctissima tueri iura, verum etiam communi populorum bono ac securitati prospicere. Scilicet *pietas ad omnia utilis est*²⁾: eaque incolumi ac vigente, *sededit reapse populus in plenitudine pacis*³⁾.

Deus, qui *dives est in misericordia*⁴⁾, hanc humanarum gentium in Christo Jesu instaurationem benignus festinet; *non enim volentis opus neque currentis, sed miserentis est Dei*⁵⁾. Nos vero, Venerabiles Fratres, *in spiritu humilitatis*⁶⁾, quotidiana et instanti prece id ab Eo contendamus ob Iesu Christi merita. Utamur praeterea praesentissima Deiparae impetratione: cui conciliandae Nobis, quoniam has litteras die ipsa damus, quae recolendo Mariali Rosario est instituta; quidquid Decessor Noster de octobri mense Virgini augustae dicando edixit, publica per templa omnia eiusdem Rosarii recitatione, Nos pariter edicimus et confirmamus; monentes insuper ut deprecatores etiam adhibeantur castissimus Dei Matris Sponsus catholicae Ecclesiae patronus sanctique Petrus et Paulus apostolorum principes.

Quae omnia ut rite eveniant et cuncta vobis pro desiderio fortunentur, divinarum gratiarum subsidia uberrime exoramus. Testem vero suavissimae caritatis, qua vos et universos fideles, quos Dei providentia Nobis commendatos voluit, complectimur, vobis, Venerabiles Fratres, clero populoque vestro apostolicam benedictionem amantissime in Domino impertimus.

1) Rom. XIII., 1. — 2) I. Tim. IV., 8. — 3) Is. XXXII., 18. — 4) Ephes. II., 4. —

5) Rom. IX., 16. — 6) Dan. III., 36.

Datum Romae apud S. Petrum, die IV. Octobris MCMIII, Pontificatus nostri anno primo.

PIUS PP. X.

Mutationes inter Vener. Clerum.

Translati Cooperatores: R. Cas. Salewski e Lisiogóra ad Królówka. R. Steph. Gawlicki e Witkowice ad Lisiogóra (cum residentia in Jasirzábka nowa). R. Ignatius Kołodziej e Pilzuo ad Tarnów. R. Adalbertus Zaráński e Gawłuszowice ad Zakliczyn. R. Stanislaus Nowak e Radłów ad Gawłuszowice. R. Joannes Pragłowski e Zakliczyn ad Mielec. R. Joannes Puskarz e Bolesław ad Wojnicz. R. Joan. Jasiak e Wojnicz ad Bochnia. R. Casim. Kaliciński e Szczepanów ad Wojnicz. R. Franc. Mucha ex Ujanowice ad Jurków. R. Jos. Sroka e Pleśna ad Ujanowice. R. Mich. Marczak ex Jasień ad Jadowniki. R. Adalb. Guzik e Łososina ad Korzenna (ad personam agroti parochi). R. Alex. Golec applicatus ad Pleśna. R. Adalb. Ścisło ad Radłów. R. Michaël Marczak ex Jadowniki ad Straszecin. —

Nominati: R. Jos. Piechowicz administrator in Okocim. R. Joan. Dulian Praefectus stud. in seminar. dioeces. et Catech. suppl. in I^o c. r. gimnasio Tarnoviensi. R. Cl. Dr. Michaël Rec vice-rector semin. dioec. R. Clar. Dr. Ladislaus Mysor assesor et Refer. actualis Consist. Eppalis. R. Michaël Wieluński administrator in Brzesko. R. Ant. Kania adm. in Zawada. R. Casim. Salewski adm. in Królówka. R. Leo Romański adm. in Pstrągowa. R. Martin. Florek adm. in Olszyny. R. Marc. Piotrowski admin. in Jasień. R. Simon Piszczkiewicz catech. schol. pop. in Bochnia. R. Joannes Dąbrowski catech. in Bochnia emigravit Americam.

Canonice instituti: R. Franc. Pawlikowski ad Ben. in Mielec. R. Alex. Sołtys ad Ben. in Zakliczyn.

Decorati: R. Andreas Niemiec Par. in Biegonice et Joan. Piaskowy Par. in Łącko R. et Mant. — R. Joan. Sawiński Par. in Szczawnica Expos. Canon.

Privati Celebret et Jurisdictione: R. Hier. Błazyński et Franc. Sosin.

Piis ad aram precibus commendantur:

anima p. m. Bartholom. Unger Parochi de Okoćim, qui die 25 julii obiit — societati precum **adscriptus**

anima p. m. Pauli Jende Defic. anteacti Parochi in Żeleznikowa — qui die 18 augusti obiit — societ. prec. **adscriptus**

anima p. m. Stanisłai Dylski Dec. et Par. in Brzesko, qui d. 7. septembris mortuus est — soc. pr. **adscriptus**

anima p. m. Caroli Dudzik Par. de Zawada, qui die 14 septembr. obiit — soc. precum **adscriptus**

anima p. m. Vinc. Wnęk Par. de Pstrągowa, qui die 27 septembris pie in Domino obdormivit — societati precum **adscriptus**.

Z KONSYSTORZA BISKUPIEGO.

W Tarnowie dnia 15. października 1903.

† LEON
BISKUP.

X. Władysław Chendyński
Kancierz.